

Headlines

1. उपराज्यपाल मनोज सिन्हा होरें स्वस्थ नारी सशक्त परिवार अभियान दी शुरूआत कीती। सेवा पखवाड़े दे हिस्से दे तौर पर उनें JLNМ अस्पताल दा दौरा लाया।
2. प्रधानमंत्री नरेंद्र मोदी हुं'दे जन्म ध्याड़े यानि अज्जै थवां 2 अक्तूबर तगर मुख भरै च सेवा पखवाड़ा शुरू होआ।
3. उपराज्यपाल मनोज सिन्हा होरें वर्चुअल माध्यम राएं रामबन-गूल शिड़क पर बैली पुल दा उद्घाटन कीता। एहदे कन्नै डेढ लख लोकें गी राबता हासिल होगा।
4. मुखमंत्री उमर अब्दुल्ला होरें पुंछ दे कालाबन दा दौरा लाया ते जमीन धस्सने करी पीड़ित लोकें लेई 38 लख रपे दी राहत सहायता दी घोशणा कीती।
5. त्रै हफ्तें तगर बंद रौहने मगरा जम्मू-श्रीनगर राश्ट्री जरनैली शिड़क भारी गड़िएं दी आओजाई लेई खुल्ली।

<><><><><><>

LG-Swasth Nari

लेफ्टिनेंट गवर्नर मनोज सिन्हा होरें अज्ज SKICC श्रीनगर सवां जम्मू-कश्मीर च 'स्वस्थ नारी-सशक्त परिवार' अभियान दी शुरूआत कीती। उनें मजबूत परिवार ते सेहतमंद समाज च महिलाएं दी सेहत ते उंदे बाख्तयार होने दे महत्वै आहली भूमिका दा जिक्र कीता।

एहदे कोला पैहले लेफ्टिनेंट गवर्नर मनोज सिन्हा होरें रैनावाड़ी च JLNМ अस्पताल दा दौरा लाया ते सेवा पखवाड़ा अभियान दे हिस्से दे तौर पर मरीजें गी फल-फ्रूट बंडेआ। प्रधानमंत्री नरेंद्र मोदी हुंदे 75में जन्मध्याड़े पर सेवा पखवाड़ा मनाया जा करदा ऐ। उनें इस गल्ला पर जोर दित्ता जे निस्वार्थ सेवा सामुदायिक बंधनें ते सांझा उद्देश्यें गी मजबूत करदी ऐ। लेफ्टिनेंट गवर्नर होरें प्रधानमंत्री हुंदे परिवर्तनकारी नेतृत्व दा जिक्र कीता जेदे तैहत 25 करोड़ लोक गरीबी सवां बाहर निकली आए न ते भारत दुनिया दी चौथी सब्बने कोला बड़ी अर्थ बवस्था बनी गेआ ऐ।

Sewa-Pakhwada

प्रधानमंत्री नरेंद्र मोदी हुंदे जन्म ध्याड़े पर अज्ज मुल्ख भरै च सेवा पखवाड़े दी शुरूआत कीती गई। एहू पखवाड़ा 2 अक्तूबर गी महात्मा गांधी ते लाल बहादुर शास्त्री हुंदी जयंती तोड़ी जारी रौहगा। विनम्र शुरूआत करदे होई दुनिया दी सब्बने कोला मती प्रभावशाली राजनीतिक शख्सियतें च इक्क बनी जाने आहले नरेंद्र मोदी हुं'दी यात्रा साधारण नेई ऐ। भारत दे प्रधानमंत्री दे तौर पर उन्दे नेतृत्व नै तरीफ ते जिज्ञासा पैदा कीती ऐ। इस विशेष कहानी च अस तुंदे लेई चुनिंदा हस्तियें दी बुआज लेइयै आए आं जेड़ी इक व्यक्ति ते प्रधानमंत्री दे रूप च नरेंद्र मोदी हुंदे पर विचार रक्खदियां न।

<><><><><><>

Plog-Run

स्वच्छता ही सेवा ते सेवा पर्व-2025 दे इक हिस्से दे तौर पर जम्मू नगर निगम आसेआ Plog run दा सरिस्ता कीता गेआ। एहू द्रौड़ सरकारी अस्पताल सरवाल थमां शुरू होई ते टाली मोड़ आइऐ सम्पन्न होई। एहदा मकसद शैहर गी हरा-भरा ते साफ बनाना ऐ। एहदे च हर वर्ग दे लोकें हिस्सा लैता। बडुलै दी द्रौड़ कन्नै लोकें कचरा बी चुक्केआ।

<><><><><><>

LG-Bailey Bridge

उपराज्यपाल मनोज सिन्हा होरें अज्ज रामबन-गूल शिड़क पर बैली पुल दा वर्चुअल ढंगै कन्नै उद्घाटन कीता। एहदे कन्नै रामबन, संगलधान ते गूल इलाकें दे तकरीबन डेढ लक्ख लोकें गी लाहू होगा। हाल च होई दी भारी बरखें ते कुदरती आपदा करी ढांचे गी बड़ा मता नुकसान पुज्जा ते राबता बड़ा मता माड़ा बाधित होआ। इस पुल गी भारती सेना नै चुनौतीपूर्ण हालात च बनाया। उपराज्यपाल मनोज सिन्हा होरें सेना दे जवानें दी सराहना कीती। डी.सी रामबन मोहम्मद अल्यास खान होर मौके पर मौजूद हे।

<><><><><><>

CM-Poonch

मुख्यमंत्री उमर अब्दुल्ला होरें पुंछ जिले दे कालाबन ग्रांड दा दौरा लाया ते जिमी धस्सने करी होए दे नुकसान दा जायजा लैता। उनें प्रभावित परौआरें कन्नै गल्ल कीती ते सरकार आसेआ पूरे सहयोग दा भरोसा दोआया। उनें 38 लक्ख रपे दी फौरी राहत सहायता दी घोशणा कीती। एहू राहत सहायता 50 लक्ख रपे दी पैहले सोयां मंजूर राशि दे अलावा ऐ। मुख्यमंत्री होरें जोर देइयै आखेआ जे सरकार इस मुश्कल दी घड़ी च लोकें दे कन्नै खड़ोती दी ऐ।

<><><><><><>

CM-Paris

मुख्यमंत्री उमर अब्दुल्ला होर 23 कोला लेइयै 25 सितंबर तोड़ी पेरिस च लग्गने आहले सैलसफा सरबन्धी I.F.T.M. टॉप रेसा प्रोग्राम च जम्मू-कश्मीर सरकार दे डैलीगेशन दी अगुवाई करडन। मुख्यमंत्री हुंदे सलाहकार नासिर असलम वाणी ते जम्मू दे सैलसफा निदेशक विकास गुप्ता होर बी इस डैलीगेशन च शामिल होडन। इस दौरे दा मकसद कुल संसारी मंच पर जम्मू-कश्मीर दे सैलसफा दी समर्थ दस्सना ते अंतरराष्ट्री पर्यटकें गी आकर्षित करना ऐ। एहू टीम सैलसफा उद्योग दे लीडरें कन्नै मिलग, सैलसफा आहली थाहर दे तौर पर उभरा करदी थाहें गी बढ़ावा देग ते इलाकाई टकोदें थाहरें गी उजागर करोग।

<><><><><><>

Traffic

जम्मू-श्रीनगर राश्ट्री जरनैली शिड़क त्र'ऊं हफ्तें मगरा भारी गड्डिएं लेई खोली दिती गेई ऐ। घाटी थमां फलें कन्नै लदोए दे केई ट्रकें मुख्य लेई अपनी जात्तरा शुरू कीती। इस जरनैली शिड़क गी भारी बरखें ते चानचक्क आए दे हाड़ें करी बड़ा मता नुकसान होआ हा। एसएसपी ट्रैफिक रविंद्र सिंह होरें आखेआ ऐ जे बत्ता खड़ोती दी गड्डिएं ते होर दुई जरूरी चीजें-बस्ते आहली गड्डिएं गी पैहल दी बिनाह पर अगो भेजेआ जाग।

<><><><><><>

Prog. Announcement GST Reforms

आकाशवाणी जम्मू दा इलाकाई समाचार एकांश 'अगली पीढ़ी सरबन्धी जी.एस.टी. सुधारें मतल्लक विषे पर इक्क 15एं मिनटें दी अवधि आह्ला विशेष परिचर्चा प्रोग्राम प्रसारित करोग। एहू परिचर्चा 0 फीसदी ते 5 फीसदी जी.एस.टी. दरें ते 12 फीसदी जीएस.टी स्लैब गी खत्मकरी देने पर आधारित होग। 19 सितंबर 2025 गी शुक्रवारें बडुलै 8 बज्जियै 45एं मिनटें पर इस प्रोग्राम दा विशेष प्रसारण होग। इस विशेष प्रसारण च जम्मू-कश्मीर सरकार दे राज्य टैक्स करें सरबन्धी मैहकमे च अतिरिक्त कमिशनर जे.के.ए.एस अधिकारी नमरिता डोगरा होर खास मेहमान होडन, जेड़ियां इस विषे पर अपने विचार सांझा करडन। स्हाढे एंकर विजय बजाज होर इस कार्यक्रम दी मेजबानी करडन। सुनदे रवो आकाशवाणी समाचार जम्मू मीडियम वेब 303 मीटर 990 किलोहर्टज पर ते एफ.एम 100.3 मेगाहर्टज पर।

<><><><><><>